

**Date – 07/04/2025**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Kum 2025-26 Sikul kum tanni vawiin hian zirna in te an in hawng tan.**
- 2. Mizoram leh Assam ramri buai chinfel tuma state pahnih official-te Guwahati a an inbiak hun atan April ni 25 ruat a ni.**
- 3. Union Home Minister Amit Shah-a chuan Jammu-a firfiakte kaihhnawih pawikhawihna thleng chu thunun thuai anih tur thu BJP MLA leh party hruaitute a tiam.**
- 4. President Droupadi Murmu chuan tukin khan Portugal khawpui Lisbon a thleng.**

<><><>

**NEW SESSION OPENS**

**Kum 2025-26 Sikul kum tanni a ni a, zirna in te chu vawiin atang hian inhawng tanin, zirlai naupang te tan vawiin atang hian zirna kalpui tan a ni ang.**

**Academic Session thar atan hian District hrang hrangah te chuan Sawrkar School, Primary leh Middle School-ah te zirlaibu sem a ni a, zirlaibu te hian zirna in zawng zawng la thleng kim lo mahse a theih ang ang chu thawnchhuah a ni tawh a ni.**

**Khawzawl District chhunga Sawrkar School 76 – Primary School 40 leh Middle School 36-ah zirlaibu sem turte hi phurh thlen a ni a, zirlaibu hi Pre Primary atanga Class VIII ten a thlawnin an dawng vek a. Khawzawl District-ah hian zirlaibu hi zaa 85 vel a thleng tawh niin Khawzawl-a kan corr chuan a sawi a ni.**

**Lawngtlai District Samagra Shiksha ten kumtin an lo sem thin Class 1-Class VIII zirlai naupangte tana a thlawna Zirlaibu kumin 2025 atana an sem chhuah tur thawh khatna chu thlahlui ni 31 khan thawnchhuah a ni a, a tahtawla thawn zel tum ani a, Zirlai nauapng ten 2025 Academic Session tan hma ngei a dawn tir hman tum ani a. Lawngtlai District hmun kilkhawr tak tak ah te ruahtui tlak hma ngeia pek chhuah vek tum a ni tih kan corr chuan a sawi a ni.**

<><><>

## HM ON PAR

Home minister Pu K. Sapdanga chuan sorkar laipui duhdan angin Lengpui tumhmunah ramdang atanga lo zinte endik hna thawh tan a nih thu a sawi.

Pu K. Sapdanga chuan sorkar laipui-in Myanmar ramri depa awm hmarchhak ram pathum Manipur, Mizoram leh Nagaland a protected area permit (PAP) leh restricted area permit (RAP) a thlahdulna a tihtawp leh tak avangin ramdang atanga lo zinte'n phalna an neih lo endikna atan Lengpui tumhmun a thlawhna atanga lo thlengte luhna hmun bulah hmun ruahman a ni, a ti a. Official lamin ruahmanna an siam tawh angin kalpui chhoh tur a ni a ti. Hemi chungchangah hian Mizoram sorkar leh ministry of home affairs (MHA) chu an inrawn tlang reng niin a sawi. Protected area regime an tih mai hi kum 14 zet thlahdul a nih hnu-ah ram thenawm Myanmar leh Bangladesh boruak avangin a taka hman leh turin nikum December thla khan MHA chuan thupek a chhuah leh ta a ni.

Home department hotute'n an sawi danin ramdangmi Mizorama lo zinte khuahkhirhna tuaithar leh a nih hnu hian RAP leh PAR hi online hmanga dil theihin MHA chuan a siam a, online hmang bawka phalna pek a ziahluh an ni tawh dawn a. He thil a taka kalpui tur hian home department chuan district tina SP-te bakah foreigner registration officer, SP CID (SB) te pualin training a lo buatsaih tawh a. MHA hnenah pawh ramdangmi lo zinte ziahluh leh lo buaipui kawnga thiltih a awlsam theihna atan Aizawl khawpui-ah hemi pual bik pisa hi rawn din turin ngen a ni bawk.

Hemi chungchangah hian March ni 10 khan chief minister Pu Lalduhoma chuan sorkar laipui inventhawanna chu a hriatthiampui thu assembly inkhawmah a lo sawi tawh a. Nikum chawhnu lam kum chanve vel chhungin ramdangmi 2,000 chuang Mizorama lo lut si-in khaw lai-ah hmuh tur an awm lo niin a sawi a.

A bikin UK mi, Russia leh Ukraine indona a kal pakhat chu Mizoram kaltlangin Myanmar ramah a lut a, hel pawlte indo dan a zirtir niin Pu Lalduhoma chuan a sawi a. A lo haw lam silaimu nen Lengpui tumhmunah man a nih thu a sawi bawk a. Ramdangmi lo zinte khuahkhirh chu Mizoram sorkar chuan tha ti lo chungin sorkar laipui rilru erawh a hriatthiampui niin chief minister chuan a sawi a ni.

<><><>

## BORDER TALKS

Mizoram leh Assam ramri buai chinfel tuma state pahnih official-te Guwahati a an inbiak hun atan April ni 25 ruat a ni.

Home minister Pu K. Sapdanga'n Akashvani Aizawl a hrilh danin Assam sorkar lamin April ni 25-a state pahnih official te ramri buai chungchang sawi tura an rawn rawtna chu a thuphunga pawm a ni a. An tum dan chuan April ni 24-ah Aizawl chhuahsanin a tukah Guwahati khawpui-ah an inbe dawn a. Home department hotute chuan tunge Mizoram ai-awha kal turte tih hi tih chian fak a la awm loh thu leh an hun hman dan tur pawh rawtna a awm chungin sorkar pawmpuina nghah mek a ni an ti. Nikum August ni 9 a Aizawl a Assam leh Mizoram minister-te inbiakna-ah khan kumin March ni 31 ral hma ngei a Guwahati a inbiak chhonzawm ni se tiin thu dah a ni a. Mahse,

Mizoram sorkarin state pahnih minister-te inbiak hma-in official-te inbe phawtin inrem lohna la awmte chingfel hmasa phawt se ti a a rawtna chu Assam sorkarin a chhang lawk lova. Vawi 3 zet lehkha an thawn hnu-ah Assam lam hian state 2 official-te inbiak phawt chu an remti ta a, a hun turah thutlukna an siam tlai avangin tunah hian inbe turin ruahmanna siam a ni ta chauh a ni.

Nikum August ni 9 khan Mizoram aiawh home minister Pu K. Sapdanga kaihhruai leh Assam aiawh an border protection & development minister Pu Atul Bora kaihhruaite chu ramri buai chinfelna atan Aizawl-ah an inbia a. Hetah hian thuchhuah intawm siamin kumin March ni 31 hma-a inbiak chhunzawm ni se an ti a, an tum angin inbiakna an chhunzawm hman ta lova. State pahnih inkar ramri-ah dinhmun pangngai bak hi engmah chet thawh lo tura intiamin chu chu bawhchhiat a awm lo ni a thudawn a ni.

State pahnih official-te inbiak hnu-ah hian minister te an inbe leh tura ngaih a ni a. An inbiak leh chuan inbiak vawi 5-na tur a ni dawn a. Sorkar hmasa hunlai khan chief minister pahnihte vawi 2 an lo inbe tawh bawk a ni.

<><><>

BELGIAN SCRIBE

March ni 6 a Lengpui tumhmuna kartut ruak 2 a kawl avanga man, Belgian chanchinbumi Simon Clement chuan a thubuai chinfel thuai a nih a beisei thu a sawi.

Tuna bail a chhuak mek Simon Clement-a chuan a thubuai khawihtu leh chhuitu Police lamin charge sheet an thehluk thuai a beisei thu Akashvani Aizawl a hrilh a. Clement-a hi March ni 19 khan Aizawl district chief judicial magistrate (CJM) chuan bail in a chhuah a. Bail-a a chhuah hian cheng sing nga chu court-ah bail bond atan thehlutin court phalna lo chuan Mizoram chhuahsan khap a ni a, court-ah a khat tawka a inlan bakah Police-in an mamawh chuan an koh hun apianga inlan tura tih a ni. Simon-a dinsaktu ukil Pu Reuben L. Tochwawng chuan Thawhlejni (April ni 8)-ah emaw hian a thubuai chhuitu Police officer hian court-ah charge sheet a thehluk theih an beisei thu a sawi a. A thubuai hi chinfel thuai an beisei thu a sawi bawk.

Simon Clement hi chanchinbu tana thlalatu (photo journalist) a ni a. Myanmar atanga a lokir hnu-ah Lengpui tumhmunah a zin bag a kartut ruak pahnih hmuh a nih avanga man a nih thu Police chuan an sawi a. Sairang Police station-ah Foreigners' Act, 1946 section 14 leh Arms Act, 1959 section 25 (1-B) hmanga thubuai siamsak a ni.

Hemi hma, nikum July ni 19 khan Lengpui tumhmunah bawk UK khua-leh-tui Daniel Newey chu a zin bag a silaimu hmuhchhuah a nih avangin man a lo ni tawh a. Daniel Newey hi Myanmar rama Chin hel pawlte ralthuam hman han zirtir a puh a ni bawk a. A chungthu hi ngaihtuah a nih hnu-ah kumin February thla laihawl khan CJM court chuan thiam chantirin a chhuah a ni.

<><><>

ASF UPDATE

Thla hlui March ni 20-a African Swine Fever vawk pulhri leng thar leh finfiah a nih atanga vawiin thlengin he vawk pulhri avang hian Mizoramah kumin hian vawk 1,163 a thi leh tawh.

Animal husbandry & veterinary department hotute hnen atanga thu dawn danin nimin khan Siaha a veng 15-ah ringawt vawk 40 a thi a. Lawngtlai khawpui-a veng 2 – Lawngtlai-4 leh Council vengah 2 ve ve thi-in Lawngtlai khua a thi hi 4 a ni a. Mamit district a Zawlnuam khua-ah pahnih a thi bawk a. Nimina ASF vawk pulhri avanga thi zawng zawng chu 46 a tling a. A hma khan Siaha khawpui-a March thla chawhnu lama vawk thi report tlai a nih avangin Siaha khawpui veng 20 a a hmalama thi nena belhkhawmin Zirtawpni khan vawk thi 343 a rawn lut thawt a ni.

Tun dinhmunah hian district 4 - Lawngtlai, Mamit, Siaha leh Lunglei a veng 39-ah vawk pulhri hi a leng mek niin Vety department hotute chuan an sawi a. Niminah khan district 3, Mamit, Siaha leh Lunglei-ah vawk 12 suat a ni a. Lunglei khawpui-ah hian Inrinni khan veng pahnihah vawk 3 thi-in Lunglawn vengah vawk 14 suat a ni a. Lunglei khawpuiah niminah vawk thi a awm lo chungin vawk 3 suat a ni. Heti hian kumin chhunga vawk suat tawh zawng zawng chu 372 a tling tawh bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

J&K

Union Home Minister Amit Shah-a chuan Jammu-a firfiakte kaihhnawih pawikhawihna thleng chu thunun anih tur thu BJP MLA leh party hruaitute a tiam. Sarwkar laipuiin Jammu and Kashmir state puitling nihna chungchang a ngai pawimawh tih sawiin a hun takah state dinhmuna hlankai an tum a ti. Pu Shaha hian darkar hnih chuang Jammu-a BJP MLA 28 te hi Trikuta Nagar-a an headquarter ah a kawm a. He hunah hian Union minister Dr.Jitendra Singh te, National General Secretary-in-Charge J&K Tarun Chug, BJP UT Chief Sat Sharma, Leader of Opposition (LOP) Sunil Sharma leh MP Juga Kishore Sharma leh Ghulam Ali Khatana te pawh an tel a ni

Unoin Home Minister hian ni thum cham turin Jammu and Kashmir hi a tlawh a. Ram venhimna dinhmun a enfiah bakah sipaite nen hun an hmang ho dawn a. Project enengmawzat a hawng bawk ang.

<><><>

PM

Prime Minister Narendra Modia chuan nimin khan Tamil Nadu-a Pamban-ah lei inkhai sawn thei vertical lift sea bridge a hawng. PM Modia hian rel kawng leh kawngpui siamna project cheng vaibelchhe 8300 hu a hawng bawk a. Thusawiin Prime Minister Modia chuan kum 10 kalta chhugnin sawrkarin hmasawna ruhrel dinna turin hma a la nasa tih sawiin ramchung kil li te inkalpawhna hmanga pawh tlang vek turin theihtawp a chhuah a ti a. Tamil Nadu hmasawna chuan ram hmasawnaah a thawhhlawk hle a ti bawk. PM Modia chuan Rameswarm-a piang President hlui Abdul Kalam-a chanchin sawiin Pu Kalam-a nun chuan science leh thlarau lam nun a thlunzawm a ni a

**ti a. Hmanlai Tamil tawng leh hnam ziarang te chu an pawimawh hle tih a sawi bawk a ni.**

<><><>

**PRESIDENT**

**President Droupadi Murmu chuan tukin khan Portugal khawpui Lisbon a thleng. President Murmu-i hi ram pahnih Portugal leh Slovakia tlawh turin a zinchhuak a. Portugal-a a cham chungin Portugal President Marcelo se Sousa nen an inkawm dawn a. Portugal PM Luis Montengro leh National Assembly President Jose Pedro Aguiar-Branco te a kawm bawk ang.**

**Portugal a tlawh zawh hian Slovakia a pan lehngal ang a. A cham chungin Slovak President Peter Pellegrini leh Prime Minister Robert Fico te a kawm dawn a ni.**

**President Murmu-i hi kum 27 hnua India President zinga Portugal tlawh leh hmasa ber leh kum 29 hnua Slovakia tlawh leh hmasa ber tu a ni.**

<><><>